

太平寰宇記

第十六冊

太平寰宇記

卷之六

太平寰宇記卷之五十八

河北道七

洺州

貝州

洺州

洺州

廣平郡今理永年縣

禹貢冀州之域星分昴宿一度禹貢

曰覃懷底績至于衡漳衡漳在今州南肥鄉縣也
春秋時爲赤狄之地後屬晉左傳宣公十五年晉
荀林父敗赤狄于曲梁今州理城也七國時屬趙
趙敬侯始都邯鄲至幽王遷爲秦所滅秦兼天下
是爲邯鄲郡地漢高帝分置廣平國自漢至晉或

爲國或爲郡永嘉末石勒據有其地石氏滅又屬慕容儁至子暉滅又屬苻堅後慕容垂得山東其地復屬焉周武帝建德六年于郡置洺州以水爲名隋大業三年罷州爲武安郡唐武德元年又改爲洺州領永年洺水平恩清漳四縣二年陷竇建德四年建德平立山東道大行臺又置曲周雞澤二縣五年罷行臺置洺州大總管府管洺衛巖相磁邢趙七州六年罷總管以磁州之武安臨洺肥鄉三縣來屬貞觀元年又以廢磁州之邯鄲來屬天寶元年改爲廣平郡乾元元年復爲洺州永泰

之後復以武安邯鄲屬磁州會昌元年省清漳洺
水二縣入肥鄉平恩曲周等縣

元領縣八 今六

永年 平恩 雞澤 曲周 臨洺 肥鄉

二縣割出

洺水 入曲周 清漳 入肥鄉

州境

東西一百九十七里 南北一百一十二里

四至八到

西南至東京五百五十里

西南至西京七百六十里

西南至長安一千六百二十里

東至天雄軍永濟縣九十五里

西至磁州武安縣界七十五里

南至相州一百八十五里

北至邢州沙河縣界四百五十里

東南至天雄軍一百二十里

西南至磁州一百二十里

東北至貝州二百三十里

直北落西至邢州九十里

戶

唐開元戶七千七百五十

皇朝戶主一萬五千一十三客一萬二千八百九十三

風俗

燕趙邯鄲風俗丈夫悲歌慷慨多弄物爲倡優女子多彈弦跕躑隋圖經云今趙女數百家每有祭祀別設客位以祀公孫杵臼及程嬰二士歷代相傳號曰祀客

人物

趙勝

趙諸公子也賓客數千

毛遂

趙勝之舍人也以三寸舌說楚同卻秦軍

廉頗

趙之良將也勇氣聞于諸侯

藺相如

趙人也送璧于秦不屈節

李

牧

趙之北邊良將也匈奴不敢入邊封為武安君

趙奢

為馬服君

石奮

趙人

也與四子皆二千石號為萬石君

土產

平紬

純子

油衣

人參

絹

永年縣

舊二十八鄉今二鄉

本漢曲梁縣地屬廣平國後漢屬

鉅鹿郡北齊天保七年併曲梁縣入廣平縣隋仁

壽元年改廣平為永年縣避煬帝諱也屬武安郡

即今縣趙奢救閼與秦軍鼓譟武安屋瓦皆動即

此地也 馬服岡史記趙奢爲馬服君受封于此
地 靈山風土記云靈山趙武靈王葬其上故曰
靈山 鬱山一名紫山出紫石英菖蒲爲仙方所
尙 榆溪山洺州記山有榆溪水因以名之 王
澤嶺趙襄子犇晉陽原過後至于王澤見三人自
帶以上可見卽此嶺 漳水風土記云南易水本
名漳水源出三門山西自肥鄉縣界流入趙地記
云六國時此水名易水埤蒼及水經云洺水之目
不知誰改俗謂山之下地名洺因經之故曰洺水
按燕趙記云其分有三易漳爲南易 洺水在縣

南三里西自臨漳縣界流入 雞澤在縣西南十

里春秋同盟于雞澤今其澤魚鼈菱芡州境所資

廉頗臺在州城南十里十六國春秋云冉閔遇

慕容恪于廉臺十戰皆敗 平劉黑闥壘在縣西

南十里洺水南唐貞觀四年于壘東置昭福寺寺

碑岑文本詞 廣平故城漢平于國廢城在今縣

北 干將城洺州記云南有干將城卽干將鑄劍

并鑪池俱存俗語訛爲韓子城 樂毅藺相如冢

並在此

平恩縣

東北五十里舊
十四鄉今三鄉

本漢舊縣屬魏郡宣帝以許

廣漢爲平恩侯魏屬廣平郡高齊天保七年移于
斥漳城今洺水縣是也隋開皇六年又自斥漳移
在平恩川今理唐臺澤一作康臺澤在縣東五
里

雞澤縣

東北五十里舊
十四鄉今三鄉

本漢廣平縣地隋開皇六年

于廣平城置雞澤縣大業二年省唐武德四年重
置洺漳二水在縣東南二十里合流東北入平
鄉界沙河卽渴水經邑界

曲周縣

東北八十里舊
十二鄉今三鄉

本漢舊縣屬廣平國酈商爲

曲周侯後漢屬鉅鹿郡魏屬魏郡後魏宣武帝改

置曲安縣屬廣平郡高齊省郡隋開皇六年復置
屬洺州大業二年省唐武德四年于曲周故城重
置漳水在縣西二十九里阿難枯渠在縣南
十四里邸閣城水經注云衡漳水又北經邸閣
西卽此城巨橋倉紂所積倉尙書發巨橋之粟
是也廢洺水縣在州西五十里本漢斥漳縣屬
廣平國漳水經其城其地斥鹵故曰斥漳隋開皇
六年以平恩移入舊地又于此立洺水縣卽今縣
也以西濱洺水爲稱唐會昌三年正月併入曲周
縣衡漳故瀆俗名阿難渠在縣西二百步蓋魏

將李阿難所導故名 董塘陂在縣西北十五里
晉龍驤將軍劉牢之北救苻丕追大將軍慕容垂
于董塘泉卽此陂也 董仲舒祠董仲舒廣川人
祠在縣東五十九里 嘯父卽冀州人也在曲周
縣市中補履數十年人奇之不老

臨洺縣

西北五十里舊
十二鄉今三鄉

本漢易陽縣也屬趙國魏屬

魏郡晉屬廣平郡後魏省入邯鄲縣孝文于北中
府城復置易陽屬廣平郡今理是也隋開皇六年
改易陽爲邯鄲縣十年移邯鄲縣理陟鄉城在今
邯鄲縣界仍于北中府城別置臨洺縣北濱洺水

爲名屬磁州大業二年割隸洺州 紫山隋圖經

云臨洺紫山春夏有紫氣蓊鬱下有石石上菖蒲

一寸九節巖間有紫石英 狗山在縣西十里山

頂石上有狗跡因名唐武德五年太宗親總戎師

討劉黑闥因此立營 鳴犢豕在縣西南十三里

家語曰孔子自衛將至晉至河聞趙簡子殺竇鳴

犢舜華遂不去

肥鄉縣

東南四十里舊十三鄉今三鄉

春秋時晉地七國時屬趙今

縣卽漢列人及邯鄲蒲縣三邑之地魏文帝黃初

二年分邯鄲等縣立肥鄉縣屬廣平郡後魏省入

臨漳縣隋開皇十年又置屬磁州十六年割隸洺州濁漳水上源卽清漳也西自相州成安縣界流入列人故城在今縣東北十五里漢爲縣按汲冢記梁惠成王八年伐邯鄲取列人卽此也漢屬廣平國邯鄲故城俗名桓公城在縣西北十里肥鄉故城在縣西南二十二里葛築故城隋圖經云葛築城俗呼葛鶯城卽趙武靈王夫人所築一云夫人城平原君墓在縣東南七里毛遂墓在縣南七里廢清漳縣在州東南七十里本漢列人縣地故城在今肥鄉縣界隋開皇十

六年于此置清漳縣以南濱清漳水爲名唐會昌
三年併入肥鄉縣 列人墀音或曰列人堤縣居
其上墀卽堤類也後魏孝昌年中有入于此掘得
破船仍是杉材尙堪用莫測其由蓋是漳水又積
淤泥遂成高岸也

貝州

貝州

清河郡今理清河縣

禹貢冀州之域星分昴宿五度春秋

之時其地屬晉七國時屬趙秦併天下爲鉅鹿郡
漢高帝三年韓信出井陘定趙地因分鉅鹿郡地
置清河郡以郡臨清水故號清河理清陽景帝中

改爲清河國至後漢復爲郡永嘉亂後石趙移郡
理平晉城卽今博州清平縣也苻秦移理武城後
魏移清河郡及清河縣于漢厝城置高齊自厝城
移郡及武城縣于今貝州西北十里故州城其城
卽漢信成縣理後周建德六年平齊於郡理置貝
州郡亦不廢隋開皇三年廢郡以郡所領縣屬州
六年移武城縣還于舊理自厝城移清河縣于州
郭大業三年罷州爲清河郡唐武德四年平竇建
德復置貝州領清河武城漳南歷亭清陽鄒夏津
七縣六年移治所于歷亭八年還于舊治九年以